

allmechtig / schepffer / vnd Vater / Der Heilige
geist auch so wol / allmechtig / schepffer
vnd Vater / vnd doch nicht drey allmechtige
Schepffer / Vater / sondern ein! Einiger / all-
mechtiger / Schepffer / Vater / Himels vnd
der Erden / vnd vnser aller. Gleich / wie der
Vater vnser Heiland vnd Erlöser / Der Son
vnser Heiland vnd Erlöser / Der Heilige geist
vnser Heiland vnd Erlöser / vnd doch nicht
drey Heilande noch Erlöser sind / sondern
ein Einiger Heiland vnd Erlöser ist. Gleich
wie der Vater vnser Gott / der Son vnser
Gott / der Heilige geist vnser Gott / doch
nicht drey Götter / sondern ein Einiger Gott
ist / Also Heiliget der Heilige geist die Chris-
tenheit / der Vater auch / der Son auch / vnd
sind doch nicht drey Heiliger oder Heiligma-
cher / sondern ein Einiger Heiligmacher &c.
Opera trinitatis ad extra sunt indiuisa.

Es ist aber alles geredt darumb / das
wir vnterschiedlich drey Personen / in der Ei-
nigen Gottheit glauben vnd erkennen / Vnd
ja nicht die Person mengen / noch das wesen
trennen. Die vnterschied des Vaters (wie ge-
hört) ist das er die Gottheit von niemand
hat / sondern sie von ewigkeit / durch die ewi-
ge geburt dem Son gegeben hat / Darumb
ist der Son / Gott vnd schepffer / gleich dem
Vater / Aber das hat er alles vom Vater /
E H nicht